

丁三

國朝詩人小傳

丁三

國朝詩人小傳

龍威秘書三集

歷代詩話八種

第三冊

國朝詩人小傳

卷一

鄭方坤



本朝名家詩鈔小傳

閩 鄭方坤 荔鄉 撰

浙江馬俊良 嶠山刪訂

目次

卷二

東癡詩鈔小傳

考功詩鈔小傳

帶經堂詩鈔小傳

堯峰詩鈔小傳

蓮洋詩鈔小傳

遺山詩鈔小傳

青門詩鈔小傳

西陂詩鈔小傳

南州草堂詩鈔小傳

樂園詩鈔小傳

種字林詩鈔小傳

古歡堂詩鈔小傳

遂初堂詩鈔小傳

有懷堂詩鈔小傳

冰菴詩鈔小傳

山聞詩鈔小傳

百尺梧桐閣詩鈔小傳

舍人詩鈔小傳

飴山詩鈔小傳

陋軒詩鈔小傳

白瀟詩鈔小傳

芭埜詩鈔小傳

突星閣詩鈔小傳

香草堂詩鈔小傳

笛漁詩鈔小傳

本朝名家詩鈔小傳卷二

閩 鄭方坤 荔鄉 撰

東癡詩鈔小傳

徐夜初名元善字長公慕嵇叔夜之爲人更今名字
嵇菴又字東癡新城人爲考功王季木先生外孫而
西樵阮亭之中表兄弟也少讀書外家洵染風氣束
髮工爲詩年二十九遭世亂遂棄諸生茅屋數椽凝
塵滿座晏如也順治辛丑一遊錢塘過孤山訪林
和靖故居渡浙江泝桐廬登嚴先生釣臺酌謝臯羽

墓裴回賦詩而返遂不復出康熙戊午己未間

詔求巖穴之士有司將以姓名上達力辭乃免東癡
爲文章原本莊騷史漢工於哀艷五言詩以陶淵
明爲宗巉刻處更似東野中歲以往屏居田廬邈與
世絕寫林水之趣道田家之致率皆世外語儲王以
下不及也晚景貧益甚阮亭司寇爲遺書邑令曰昔
元道州狀舉處士張季秀請縣官爲造艸舍十數間
給水田幾十畝免其徭役令得保遂其志使士人識
廉耻之方又楊君謙蘇談記中峰草堂馮海粟煉泥

趙松雪搬運中峯塗壁吳人至今傳爲雅談今徐先生簞瓢屢空所居一畝與蓬藿鼪鼯共之明公誠能修式廬之典捐草堂之資繼跡次山海粟松雪三君子者亦佳話也然當路終無知之者卒困頓窮餓以死詩亦散佚無存司寇爲搜得百餘首編梓以傳云

言金人作卷二

十笏草堂詩鈔小傳

王士祿字子底自號西樵山人舉順治乙未進士爲人清介有守自少以文章知名尤工於詩與弟東亭阮亭並馳聲藝苑海內聞人縞紵論交時號三王旣登第就萊州府教授尋遷國子助教擢吏部考功員外郎癸卯典河南試旋以磨勘罹吏議下獄鍛鍊久之無所得得昭雪則跳身之吳越偕諸名士爲六橋三竺之遊銀甲彈箏金魚換酒泛月坐花逾時忘返識者嘆爲神仙中人焉嗣仍以原官補用踰年聞母

訃晝夜擗踊投地絕而復蘇勺水溢米不入口者數
日旣奔喪歸中夜悲號卒以哀毀成疾枕席皆辨辨
血漬也蓋距太夫人小祥未二旬而歿親知哀其以
孝死也私謚節孝先生云西樵少穎悟率諸弟讀書
家塾授以詩法諸弟漸次成名而阮亭尤稱白眉竟
以詩雄壇坫海內翕然宗之閩人林古度論次其集
推季木爲先河謂家學門風淵源有自然季木瞻而
肆踔厲風發固自別有門庭且時代較遠而西樵嘗
題孟襄陽詩曰魚鳥雲沙見楚天清詩句句果堪傳

一從時世矜高唱誰識襄陽孟浩然足徵其微旨所
寄漁洋詩格正復不離其宗葦路藍縷哲昆賓首庸
焉此如東漢配天之業固歸光武而傾身結客實齊
武王之首發其端也西樵性簡易豪宕作香奩詩自
序云情至之語風雅掃地然不過使我於宣尼廡下
無分耳蓋其托興如此當磨勘之獄解扁舟南下阮
亭時爲維揚司李迎於秦郵相見持之而泣西樵都
不及患難時事直取一巨編置前曰弟視吾詩境地
較前差進否人嘆其放達生平撰著最夥阮亭取坡

公語評其詩曰出新意於法度之中寄妙理於豪放之外準古論今其亦無溢美爾矣世咸目爲定評云

帶經堂詩鈔小傳

王士正字貽上一字阮亭又別自號漁洋山人海內
所尊爲漁洋先生者也先生幼負聖童之目六七歲
入家塾受詩至綠衣燕燕等篇不覺潛焉出涕遂悟
興觀羣怨之旨祖方伯公年八十餘家居課諸孫而
從叔祖洞庭先生善艸書又喜飲酒一日醉墨淋漓
公顧諸孫命對云醉愛羲之蹟先生時年十一歲卽
應聲曰間吟白也詩方伯公大喜賜畫扇二又暑時
作落葉詩數篇有云已共寒江湖上下况逢新燕影

差池又云年年搖落吳江思忍向烟波問板橋有落
箋堂初編伯氏西樵先生爲序而刻之年十八順治
辛卯舉於鄉乙未成進士年纔二十有二先生旣早
達因得棄帖括弗事而專致力於詩上溯三百篇下
逮漢魏六朝唐宋元明之製靡不窮其派別而折衷
其指歸其大要見於論詩三十六絕句時先生年甫
二十九居然少年也而詩學已蔚然成一大家旣從
理官遷郎署改官禁近躋位九列風猷節概卓卓乎
有與文章著述相表裏者久之坐失出罷官卽日就